

10. oktober

UKA2018/192

Uunga siunnersuut: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaata allanngortinneqarnissaa pillugu Inatsisartut inatsisaat nr. xx, xx. xxx 2018-imeersoq. (Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut isertitassanut tunngavissat annertusineqarnerat, innersuussutip naqqiissuteqarfigineqarnera, pisortat ataatsimoorussamik IT atorlugu aqqiissuussinerat aamma missingersuutit oqimaaqatigiinnerat pillugu §§ 2-5-imik atorunnaarsitsigallartarneq)
(Aningasaqarnermut Naalakkersuisoq)

Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaata allanngortinneqarnissaa pillugu Naalakkersuisut saqqummiussaas Siumumiit ima oqaaseqarfigissavarput.:

Siumumiit paasivarput inatsimmi allannguutissatut siunnersuutaasut nunatsinni pissusiulersunut nutaanut pisartussanullu naleqqussaaneqarnermik imaqartut aammalu soorunami teknikkikkut naleqqussaaneqarnermik aamma imaqarlutik.

Siumumiit isumaqarpugut pingaartuusoq Namminersorlutik oqartussanit kommuuniniillu innuttaasut akileraarutaasigut, suliffeqarfiit akileraarutaasigut, aammalu soorunami nunatsinni aatsitassarsiornikkut akileraarutitigut isertinneqartartut, allatigullu aqqiissuussinertigut pisortanit isertinneqartartut pisariitsumik paasiuminartumillu inatsisitigut malitassatigut aqqiissuussivigineqarsimanissaat. Naatsumik oqaatigalugu Inatsisitigut piimasaqaatit aalajangersarneqartut paasiuminartuusapput atoruminartuullutillu.

Siumumiit oqaatigeriissavarput siunnersuut manna Aningaasaqarnermut Ataatsimiititaliamut nalilersoqqissaagassanngorlugu ingerlateqqinnissaa kaammattuutigatsigu. Ataatsimiititaliamullu eqqumaffigeqqussavarput akileraarutitigut il.il. isertinneqartartut ilaasa Piffissaq ungasinnerusoq eqqarsaatigalugu aningaasaliissuteqarnissamut Aningaasaateqarfimmut tutsinneqartarnissaannik aalajangersaanissaq nalilersoqqissaqqullugu. Tunngaviusumik siunertaasoq ajorinngikkaluarlugu isumaqaratta taamatut pisortat aningaasaataannik Aningaasaateqarfimmut pituttuisarneq ilaatigut qanoq iliuusaasinnaasunut eqaallisaataanani aporfissalersuisuusartoq.

Taamannak oqaaseqarluta siunnersuut Aningaasaqarnermut akileraartarnermullu ataatsimiititaliami suliarineqarnissaa kaammattuutigaarput.

Oqallilluarisilu

Jess Svane, Siumut